

宋詩鈔初集

宋詩鈔初集

滄浪集鈔

蘇舜欽字子美梓州銅山人以父任補太廟齋郎調榮陽尉尋第進士改光祿寺主簿知長垣縣遷大理評事監在京店宅務以范仲淹薦召試集賢校理監進奏院舜欽所論侵權貴而婦父杜衍與仲淹富弼在政府爲時忌會進奏院祠神晏會不與者銜劾舜欽用鬻故紙公錢召妓樂醉歌狂悖因欲搖動衍等舜欽坐除名後爲湖州長史卒年四十一旣廢居蘇州買水石作滄浪亭益讀書時發憤懣于歌詩善草書酣酒落筆往往驚人與梅堯臣齊名時稱蘇梅劉後村謂其歌行雄放於聖俞軒昂不羈如其爲人及蟠屈爲吳體則極平夷安帖蓋宋初始爲大雅於古朴中具灝落淳畜之妙二家

所同擅而梅之淡遠閒淡蘇之超邁橫絕則又各出機杼永叔所謂不能優劣者也至情志忠惻而議論當理要又非詩人粗豪一流所比詩有云筆下驅古風直趨聖所存又曰會將趨古淡先可去浮囂其本領卓越如此

感興三首

後寢藏衣冠前廟宅神主吾聞諸禮經此制出中古秦嬴食先法乃復祭於墓漢衣以月遊於道蓋無取宣帝尊祖廟失制徧九土孝元酌前文一旦悉除去魏帝樂銅臺遺令置歌舞昏嗣竟從之此事狂夫阻唐制益紛華諸陵銷嬪御曠女日哀吟於先亦奚補吾朝三聖人乘雲不可睹威靈已霄漢嗣皇念宗祖繪事移天光刻象肖神武徧勅

舊遊地輪材起宮宇階城釵以金墻壁衣之黼功旣卽奉
迎泐仗疊簫鼓玩好擇珍奇目奪不可數三京佛老家已
有十數處朝家雖奉先越禮古不許君不祭臣僕父不祭
支庶丹楹豈非孝聖貶甚蕭斧大祀當以時寢廟卽其所
惜哉共儉德乃爲侈所監痛乎神聖姿遂與夷爲侶蒼生
何其愚瞻歎走旁午賤子私自嗟傷時淚如雨

昔在帝舜日光宅闕四門所貴無凶邪德教日益敦末世
多濫姦九重嚴大閹扞極主譏察誰何辯語言一關百力
士列立甃石溫設官按尺籍唱號於未昏唐末稍懈怠嘗
值外使奔京城凶豪兒奮劒闖帝藩狂呼嘯虎豹便欲傾
乾坤賴有宰相在不然神器翻我朝講制度門籍反不存
近知賤丈夫突入犯赤軒陞官未暇執嗷嗷何其誼祖宗

創業難慎重在後昆勇夫猶重閉况乃天子尊何羅猶宜
察况乃外寇屯興語一及此舌出反自捫吾家本寒微世
受朝廷恩欲奏鴟鴞詩當塗誰薦論

瞽說聖所擇愚謀帝不罪况乎言有文白黑時利害前日
林書生自謂胷臆大潛心撫世病策成謂可賣投顙觸諫
函獻言何耿介云昨見凶星上帝下警戒意若日昏掇出
處恣蜂蠆安坐弄神器開門納珍賄宗支若繫囚親親禮
日殺大臣尸其柄咋舌希龍拜速速伐虎叢無使自沉瘵
陛下幸察之聰明卽不壞如忽賤臣言不瞬防禍敗一封
朝飛入羣目已眦睚力夫暮塞門執縛不容喟十手捽其
胡如負殺人債幽諸死牢中繫灼若龜蔡亦旣下風指黥
而播諸海長塗萬餘里一錢不得帶必令朝夕間渴飢死

於械從前有口者踣脰氣如鞞獨夫已去除易若吹糠稗
奈何上帝明非德不可蓋倏忽未十旬炎官下其怪乙夜
紫禁中一燎不存芥天王下牀走蒼猝畏挂礙連延舊寢
廷頓失若空寨明朝黃紙出大赦徧中外嗟乎林書生生
命不可再翻令凶惡囚纍纍受恩貸

慶州敗

無戰王者師有備軍之志天下承平數十年此語雖存人
所棄今歲西戎背世盟直隨秋風寇邊城屠殺熟戶燒障
堡十萬馳騁山嶽傾國家防塞今有誰官爲承制乳臭兒
酣觴大嚼乃事業何嘗識會兵之機符移火急蒐卒乘意
謂就戮如縛尸未成一軍已出戰驅逐急使緣嶮巖馬肥
甲重士飽喘雖有弓劒何所施連顛自欲墮溪谷騎虜指

笑聲嘻嘻一麾發伏雁行出山下奄截成重圍我軍免宵
乞死所承制面縛交涕洟逡巡下令藝者全爭獻小伎歌
且吹其餘劓馘放之太東走矢液皆淋漓首無耳準若怪
獸不自愧恥猶生歸守者沮氣陷者苦盡由主將之所爲
地機不見欲僥勝羞辱中國堪傷悲

及第後與同年宴李丞相宅

十年苦學文出語背時向茆力不自知藝圍輒掉鞅薄伎
遭休明一第君所唱拔身泥滓底飄迹雲霞上氣和朝言
甘夢好夕魂王軒眉失舊斂舉意有新况爽如秋後鷹榮
若凱旋將台府張宴集吾輩縱謔浪花梢血點乾酒面玉
紋漲狂歌互喧傳醉舞迭闐伉茲時實無營此樂亦以壯
太公登顯涂幸無隳素尚

昇陽殿故址

昔在開元中此名昇陽殿西通大名宮夾道直如箭至尊
黃金輿乘春日幸宴翠嬪戛鐘鼓歡呼奏新徧巧舞風燕
翻妖歌露鶯囀酒光射錦幄上下花會炫雕盤堆繁英艷
粉弱自戰天歡日無窮臣諫莫敢獻樂極哀繼之在理亦
可見胡來塞宮闕腥膻污香薦縱火寢廟平揮戈君臣逆
庸嗣忽前醜泚巢福更亂冉冉竟覆亡返爲耕牧便瓦礫
雖費犁土壤頗肥衍蓋由殺人多膏血浸漬遠鬻髀今成
堆皆昔燕趙面每因鋤耨時數得寶玉片今秋雨澤多穀
穗密如辨農惟喜豐稔吾獨憫遷變不有失德君焉爲穡
夫佃大國尚如此小人易流轉道德可久長作詩將自勸

藍田悟真寺作

旅食長安城廻遑奔走無停行清懷壯抱失素向胷中堆
積塵土生偷閒得至玉峰下爲聞悟真之寺之嘉名杖筇
赤脚渡藍水細流激激心骨清仰看蒼山高峰旁白雲明
滅藏日光行人遙指置寺處正在白雲之中央逡巡緣棧
更險絕攀蘿捫壁隨低昂明行咫尺乃相失已與雲霧相
翱翔時聞啼鳥如吹竹數步一休還縱目行行未知高則
危下視昏煙覆平陸滿巖佳樹光樸檉赫赤如霞間濃綠
是時八月初路旁已見芬芬菊貪奇戀景不知倦則睥又
復心瑟縮神竄飛下大壑幽定省移時進雙足寺門高開
朝日輝丹青黯淡唐時屋老僧引我周遊看且云白氏子
詩乃實錄此詩疇昔予所聞殷勤更向碑前讀按言索像
今無復惟有流泉數道如車輻我嫌世累欲暫居又云此

地無畱宿殿宇之後林莽中日暮常有虎豹伏鑿石龕邊
崖至深近有浮屠於此相棖觸快心宿忿兩不解一乃顛
擠死其咎我聞爲之久輦感此向期將避煩辱不爲傷生
事更多爭如平地隨流俗歎息回頭急出山始覺全軀已
爲福

興慶池

餘潤漲龍渠疏溜連清漣助曉遠昏山浮秋明刮眼漁歸
別浦閒雁下滄波晚岸北有高臺離魂蕩無限

長安春日效東野

前秋長安春今春長安秋節物自榮悴我有樂與憂窮閭
何卑漏時燕不見投門庭謝過從蘭萌舒綠柔燕託喜廣
廈亦非善是仇蘭生靜愈茂堪將義爲儔芳香誠可慕對

之蠲窮愁

太行道

行行太行道一步三歎息念厥造化初夫何險此極左右
無底壑前後至頑石高者欲作天朋黨淡者疑斷地血脉
夜中巖下埋斗杓日午陰壁風雪號攀緣有路到絕仞四
望羣峰合沓如波濤忽至逼側處咫尺顛墜恐莫逃嗟乎
古昔未開時隔截往來人不思淳源一破山嶽碎巧心遂
太緣嶮巖嶮不窮甚可畏悼此二者亡其宜天地不自
嶮嶮由人爲之彼車摧輪馬傷足中路勿歎勿慟哭世上
安塗故有焉孰使汝行此道驅高軒喪墜不收宜爾然

對酒

丈夫少也不富貴胡顏奔走乎塵世予年已壯志未行案

上敦敦考文字有時愁思不可掇崢嶸腹中失和氣待官
得來太行顛太行美酒清如天長歌忽發淚迸落一飲一
斗心浩然嗟乎吾道不如酒平褫哀樂如摧朽讀書百事
人不知地下劉伶吾與歸

夜中

夜分衆誼死耿耿抱真履中君湛以寧不爲外官使七兵
乘間入攻剽勢向圯主將不謀陣敵惡蕩然失守遽藏避
駭浪奔騰一刻萬里紛紛變化無窮已俄如獨繭絲忽復
滿天地乳虎不受縛狂龍難馴致我思精甲以扞異類邪
慝弗萌元辟復位輔以逍遙之至道爛然光輝照無際

蜀士

蜀國天下險奇怪生中間有士賈其姓抱才東入關獻冊

叩諫鼓其言蔚可觀願以微賤軀一得至上前掉舌滅西
寇畫地收幽燕且云太平久兵戰無言臣嘗學其法自
集數百篇治亂與成敗密然不可刪三獻輒罷公志屈心
悲酸將相門戶深欲往復見攔負販冒日熱引重衝雪寒
羈苦輦轂下以圖晨夕餐如此三歲餘夜夜抱膝歎義者
或賑給遂復歸巴川嗟乎區宇大此徒亦已繁城市與巖
穴隱默孰辨旃幸得出自鬻何惜置末班吾相柄天下處
事當機先古之設爵位蓋欲英雄躔次第立名級不使智
慮閑稍有才器者必以祿仕牽所患在不出旣出那棄捐
放蛟入大水驅虎還溪山失一故無害其類莫可攀

已卯冬大寒有感

延川未撤警夕烽照冰雪窮邊苦寒地兵氣相躔結主將

初臨戎猛息風前發朝笳吹餘哀疊鼓暮不絕淹留未見
敵愁端密如髮予聞古烈士自誓立壯節九泥封函關長
纓繫南越本爲朝廷羞寧計身命活功名非與期冊書豈
磨滅然由在遇專醜類易翦伐訓士無他才賞罰在果決
近聞邊方奏中覆多沉沒罪者旣稽誅功者不見閱雖使
頗牧生勇智當坐竭或云廟堂上與彼勢相戛恐其立異
勲欻然自超拔不知百萬師寒刮膚革裂關中困誅斂農
產半匱竭我欲吁上帝願帝下明罰早令黠虜亡無爲生
民孽

獵狐篇

老狐宅城隅涵養體豐大不知窟穴處草木但掩藹秋食
承露禾夏飲灌園派暮夜出旁舍雞畜遭橫害晚登埤堦

塢呼吸召百怪或爲嬰兒啼或變艷婦態不知幾十年出
處頗安泰古語比社鼠蓋亦有恃賴邑中年少兒耽獵若
沉瘳遠郊盡雉兔近水磯鱗介養犬號青鵲逐獸馳不再
勇聞此老狐取必將自快縱犬索幽邃張人作疆界茲時
頗窘急迸出赤電駭羣小助嘖嘖奔馳數顛沛所向不能
入有類狼失狽鈎牙咋巨額髓血相潰沫喘呌遂死矣爭
觀若期會何暇正首丘腥臊滿蓬艾數穴相穿通城堞幾
隳壞久此縱凶妖一旦果禍敗皮爲榻上藉肉作盤中膾
觀此爲之吟書以爲警戒

舟中感懷寄館中諸君

時得告之山陽挈家

扁舟迎春色東下淮楚鄉側身風波地回首英俊場顧我
本俗材百事無一長濫迹入冊府舉動初不皇乍脫泥滓

底稍見日月光峻閣鬱前起隱嶙天中央春風花竹明曉
雨宮殿涼溢目盡圖史接翼皆鸞鳳明窗置刀筆大案羅
縑緗文字雖幼學鈍慵今廢忘不能溫舊習考古評興亡
覲顏於其間汗下如流漿徒然日飽食出入隨羣行朝廷
此多事亦合強激昂况有詔書在爛然貼北牆奮舌說利
害以救民膏肓不然棄硯席挺身赴邊疆喋血鏖羌戎冒
膽森開張彎弓射攬搶躍馬埽大荒功勳入丹青名迹萬
世香是亦丈夫事不爲鼠子量數事皆不能徒只飽腹腸
有如鳬雁兒嗷嗷守稻梁歲月今逝矣齒搖髮已蒼於時
旣無益自合早退藏諸君天下選才業吁異常願當發冊
慮坐使中國強蠻夷不敢欺四海無災殃莫效不肖者所
嚮皆荒唐又不耐羞恥但欲歸滄浪濡毫備歌詠仰首看